

síðar, ef henta þykir. Skipulagsskránni má breyta, ef hún engan veginn nær tilgangi sinnum, og skulu þá gera það formaður sóknarnefndar Skarðskirkjusóknar, sóknarprestur og prófastur Rangárvallaprófastsdæmis.

## 7. gr.

Skipulagsskrá þessi óskast staðfest af forseta Íslands og birt í B-deild Sjórnartíðinda.

Skarði á Landi í marz 1963.

Í sóknarnefnd Skarðskirkjusóknar.

Guðni Kristinsson.

Gísli Kristjánsson.

Elsa D. Pálsdóttir.

Staðfesting forsetans á skipulagsskrá fyrir Bláa Bandið í Reykjavík, útgefin á venjulegan hátt að mandatum af dómsmálaráðherra 27. marz 1963.

Skipulagsskráin er þannig:

## SKIPULAGSSKRÁ

fyrir Bláa Bandið í Reykjavík.

## 1. gr.

Tilgangur stofnunarinnar er að koma upp og reka hjúkrunarstöðvar og dvalarheimili fyrir drykkjusjúkt fólk, sem af eigin hvötum vill leita sér lækninga á drykkjuskap sínum. Ákveða skal með reglugerð, sem heilbrigðismálaráðherra staðfestir, alla nánari rekstrartilhögun stofnunarinnar og hjálparstöðva þeirra, sem hún kemur á fót og starfrækir.

## 2. gr.

Stofnendur Bláa Bandsins hafa lagt fram í peningum 100 þúsund krónur sem óafturkræft stofnframlag og taka þeir ekki á sig neinar fjárhagsskuldbindingar vegna stofnunarinnar umfram það fé, sem þeir hafa lagt fram í stofnsjóð.

## 3. gr.

Í félaginu „Bláa Bandið“, sem annast rekstur stofnunarinnar og er styrktarfélag hennar, skulu ávallt vera, samkvæmt stofnsamningi þess 25 menn — hvorki fleiri né færri — og hefur hver þeirra eitt atkvæði á félagsfundi. Þegar félagsmaður deyr eða hverfur úr félaginu af öðrum ástæðum, skulu þeir, sem eftir eru, velja mann í hans stað á næsta félagsfundi og er sá valinn, sem hlýtur minnst 15 atkvæði, ef val er ekki ágreiningslaust.

## 4. gr.

Aðalfundur Bláa Bandsins skal haldinn í aprilmánuði ár hvert og er hann lögmætur, ef hann hefur verið boðaður með ábyrgðarbréfi til hvers félagsmanns og auglýsingu í dagblaði í Reykjavík eða í ríkisútvarpinu.

Á aðalfundi skal gefa skýrslu um starfsemi stofnunarinnar á liðnu ári, samþykkja endurskoðaða reikninga hennar, kjósa stofnuninni stjórn og afgreiða önnur nauðsynleg mál, er fyrir liggja og stofnunina varða.

## 5. gr.

Stjórn stofnunarinnar skipa 5 menn, kosnir á aðalfundi úr hópi félagsmanna til eins árs í senn. Formaður skal kosinn sérstaklega en að öðru leyti skiptir stjórnin með sér verkum. Stjórnin fer með allt vald í málefnum stofnunarinnar milli funda. Hún ræður framkvæmdastjóra og lækna, ákveður fjölda starfsfólks hverju sinni og hefur á hendi yfirstjórn fjármála stofnunarinnar.

Stjórn félagsins ber yfirleitt að efla hag og heill stofnunarinnar í öllum greinum, auka starfsemi hennar, er þörf krefur og kringumstæður leyfa, og sjá um, að hún gegni því hlutverki, sem henni er ætlað, svo vel sem kostur er á hverjum tíma.

## 6. gr.

Reikningar stofnunarinnar skulu endurskoðaðir af tveimur mönnum, og skal annar útnefndur af heilbrigðismálaráðherra en hinn kosinn á aðalfundi félagsins til eins árs í senn. Heimilt skal stjórninni, með samþykki heilbrigðismálaráðherra, að fela löggiltum endurskoðanda endurskoðun reikninganna.

## 7. gr.

Ekki má selja eða láta af hendi stofnunina eða eignir hennar, fastar eða lausar, nema andvirðinu sé beinlínis varið til að reisa og reka aðrar og fullkomnari hjálparstöðvar fyrir drykkjusjúklinga í Reykjavík eða nágrenni hennar.

Eigi má heldur binda fé hennar eða eignir nokkrum veðböndum eða skuldbindingum, sem óviðkomandi eru tilgangi stofnunarinnar.

## 8. gr.

Komi einhverntíma að því, að stofnunarinnar verður ekki lengur þörf, rekstur hennar hættir eða félag „Bláa Bandið“ leysist upp eða verður óstarfhæft, skal gefa bæjarstjórn Reykjavíkur kost á að taka við stofnuninni og rekstri hennar, en hafni bæjarstjórn því boði, skal heilbrigðismálaráðherra ráðstafa stofnuninni og eignum hennar á þann veg, sem þá þykir mest í samræmi við upphaflegan tilgang hennar.

## 9. gr.

Skipulagsskrá þessari verður ekki breytt, nema með  $\frac{4}{5}$  atkvæða á aðalfundi Bláa Bandsins, og þó aldrei ákvæðum 3. greinar, enda hljóti breytingin staðfestingu heilbrigðismálaráðherra.

Á skipulagsskrá þessari skal leita staðfestingar forseta Íslands.

Reykjavík, 22. ágúst 1962.

Stjórn Áfengisvarnafélagsins Bláa Bandið.

Jónas Guðmundsson.

Guðm. Jóhannson.

Jónas Thoroddsen.

Sig. Egilsson.

Vilhj. Heiðdal.